

2
APOLOGIE
POVR LES
BAINS D'AIX.

*Par M. Anthoine Merindol,
Docteur en Medecine.*

Contre le Sieur de Castelmont
Chymiste.



A AIX,

*Par Iean Tholosan Imprimeur du Roy &
de ladicte Ville.*

1600.



APOLLO

POVR LES

BAINS D'ÉTÉ

PAR M. L. L. L.

PARIS

CHATELAIN

CHATELAIN



CHATELAIN

CHATELAIN

CHATELAIN

1000



A Messieurs,
Les Consuls & Assesseur
d'Aix, Procureurs du
pays.



ESSIEURS,
voicy deux qui se
debattent pour voz
bains : l'un, pour
les auoir à sa fan-
tasie : l'autre, pour
vous les faire auoir plus salutaires. Es-
pluchez (s'il vous plaist) avec le conseil
de ceux qui vous en peuuent donner ad-
uis: qui des deux parle plus à vostre ad-
uantage. Toute la difficulté est, en quel
lieu on les doibt rebastir, pour estre plus
profitables au public. Le reste de nos con-
trouerses, sont pour esclarcir les proprie-

tez de l'eau : Le premier depend de vo-
stre resolution : & le second se deuidera
par la force des raisons. Vous iugerez
Messieurs, à qui sera deu l'aduantage,
& mettant en effect ce qui en sera iugé:
obligeant voz citoyens, obligerez aussi
celuy qui desireux du bien de sa ville: se-
ra comme il est,

MESSIEURS,

Vostre tres-humble & obe-
issant Seruiteur,

ANTHOINE MERINDOL.

APOLOGIE

AV. SIEVR DE CA-

stelmont Chymiste.



TOUT aussi tost (Monsieur,) que
j'eus estallé mon discours des
bains: le bruit fust espars par la
Ville, que vostre repartie estoit
sur la presse, armée de mille raisons contre
mon escrit. Teschauffois desia mes esprits au
combat, & plain de courage vous attendois
à la luitte: mais trois mois & plus se sont pas-
sez sans voir les effects de ce bruit. Ceste lon-
gueur auoit presque perdu mon humeur
guerriere: quand j'ay veu vne coppie de vo-
stre imprimé, qui en façon de cartel m'a des-
fié au combat. Me voicy paroistre sans em-
prunt: pour vous répondre: encor que mon
premier escrit (qui n'est point esbranlé du
vostre) responde pour soy mesme. Car vous
n'auiez pour tout en vostre discours, qu'une
insolente & iniurieuse aigreur: hors de la
vous estes sans methode, & sans raison. Aussi,
m'assurant que la foiblesse d'un tel aduer-
saire, me rendroit la victoire peu honorable,

& le trophée defestimé : vous eussiez escrit sans responce, si ce mérité défaut n'eut enhardy vostre temeraire ventance. Il vous suffit de dire quelque chose contre ce que i'ay publié, sans respondre à mes raisons, & en apporter des contraires. Vous n'avez pas encor acquis tant de la creance, qu'il soit assez de l'auoir dict, pour le faire croire. Mais ie vois que vous ne pouuez mieux: mesme avec l'ayde de vos amis. Emploiez en des autres, qui discourent plus à propos: puis que les premiers vous ont mal seruy. Ils debuoiert enfiler tout au long, & vous assister d'auantage. Toutesfois excusez les: ils ne sont qu'Escoliers. & n'ont iamais estudié en Medecine. Auec ce ils ont adjancé vostre entree de la sorte, que tout le discours semble vn vieux & sale bastiment, couuert d'vne iolie faffade. Ce qui est party de vostre main, est aisé à recognoistre: l'ouurage est digne de l'ouurier. Scaglier le disoit:

In Epi-
dorpi-
dis.

Secum bona non ruminat vlla circulator:

Sed retia tendit fatuis, hiantibusque.

L'vn & l'autre estes sans excuse, de ce que trop hardiment, vous me brocardez. Pour yser de reccrimination, vous deuez me rancer au vray: puis que ce que i'ay dit, qui vo⁹ pinse est veritable. Vous me nomez Onocephale, ne seruant que de Zere, sans ceruelle; enflé d'ire, esmeu d'enuie, auaricieux, & ennemy du profit de ma patrie: qui le iugera vraysemblable? le manque pour vray de beau-

coup de belles qualitez, qui doiuent accompagner ceux de mon estat: mais ie ne suis pas doué (grace à Dieu) d'une ame si malautrue.

Turpis maledicentia, nusquamque ferenda.

Se se lacerans conficit, in se que redundat.

Vos mesdisances ne m'esmeuent point: ie les tairay, sans y respondre. Vne seule chose m'offence: Qu'ils se trouuent des personnes babillardes, qui vont criallant avec vous, que les Medecins n'ont iamais parlé des bains, auant vostre venue. Il y a plusieurs hommes d'honneur dans la Ville, qui sçauent le contraire. La plus-part de ceux qui s'en sont seruis: l'on fai& par l'aduis des Medecins, C'estoit assez pour nostre charge, aux occasions qui se sont offertes: d'auoir publié de parole, & d'effect, les qualitez & proprietiez d'iceux. Il n'appartient pas à nous de les remettre: & à nos fraiz y faire faire les bastimens necessaires. Je ne parle pas de moy tout seul: Messieurs Bertrand, Aymar, Fontaine, Constantin, Grassy, & tous les autres qui y sont, avec plusieurs qui nous ont deuancé; en ont dit assez, pour esmouuoir ceux qui auoient la charge du public, de les remettre en estat digne de leur merite. Dieu vueille que les affaires permettent à Messieurs les Consuls qui sont à present, d'obliger le public d'un œuure tant salutaire à nous, & honorable à eux. Comment aurions nous appris de vous, le pouuoir & bonté de nos bains: que vous ne les sçauiez pas. Mon liuret pres-

que dicté sur la Presse, vous auoit frayé le chemin: & avec ce guide, vous vous estes encor desuoyé. Toute la suite de mon Appologie prouuera ceste proposition, Car en espluchant ce que vous en dictes (ioint à ce que j'en ay premierement escrit) ie feray voir que vous ignorez entierement quels sont, & à quoy seruent nos bains.

de la di-
ferente
bôté des
2. sour-
ces,

Vous estes tres bien informé (dittes vous) de la source des bains de l'Observance: & qu'elle n'est pas si bonne que celle des Baignez. Que ne respondes-vous aux raisons contenues en la page quatorzième de mon traitté? Que n'alleguez vous des experiences au contraire? puis que toutes vos armes sont l'experience. La raison que vous cotez au chapitre sixiesme pour toute preuue, est fondee sur vn euident mensonge. Vous dittes qu'en l'Observance à vn pied de la source chaude y en a vne grandissime d'eau froide. Si cela estoit il est tout certain, que l'eau des baignez en seroit meilleure. Veu que l'eau commune ne se meslant pas si tard avec la chaude en ceste fontaine: toutes les deux se seroient acquises plus de conformité de nature, & d'action. Mais si vous fussiez esté si curieux, que de descédre dans ceste groüe de l'Observance, comme moy, vous auriez veu, que ce que vous en rapportez est faux. Ce qui y est, & que j'ay remarqué en mon premier discours: n'est pas considerable, & fort aysé à corriger. Je vous prie, débattons vn peu plus

particulièrement ce chef. Vous voulez que l'eau des bains , soit pire que celle des Baignez. Est-ce que leurs mixtions mineralles, & leurs facultez soient différentes ? Si vous en auez ceste creance : l'ayant prouué, vous auiés mille raisons pour me combattre , mais vous ne sçauriés vous seruir de ceste supposition: puis que l'experience leur attribue pareilles facultez:& les sens y marquent mesme odeur,& mesme saueur. Puis doncques qu'elles ont mesmes proprietéz , sçachons qu'elles sont plus actiues , & par consequent meilleures. Ne m'accorderez vous pas, que la plus chaude source de ces deux, sera plus puissante en action. Soit que l'actuelle chaleur, vige celle qui se trouue en l'agent par puissance. Ou que celle qui sera plus chaude: monstre d'auoir moins de mixtion de froide non mineralle , & d'estre plus voisine de sa source. Or il est tout certain, que l'eau puisee dans la grotte de l'Obseruance, est plus chaude que celle des baignez. Parquoy celle des baignez sera la moins actiue. Le sentiment sera iuge de mon dire : & i'ay donné l'adresse en mon discours, d'en faire vn'espreuue publique. Que si les doctes estiment que mes raisons portent coup : & iugent que la source des bains est plus actiue , & plus puissante que l'autre: j'auray gaigné ma cause : & prouué de tous costez qu'il est meilleur de remettre les bains à l'Obseruance , que d'en bastir de nouveaux aux baignez. Pour affermir ce

iugement, outre ce que i'en ay ia escrit. Ceste
autorité de Constantin y seruit beaucoup.

Lib. 2.
de Agri-
cul, cap.
2.

*At vero balnea vice versa facere oportet, non ut ad
Boream & Septentrionem aspectum vertant, sed
ad occasum hybernum aut ad meridiem. Sint autem
hac ampla, & purum aerem suscipientia. Etenim
sterquiliniis & cæno fœtentibus locis in vicinia non
existentibus purus aer ingreditur.* Aduisez s'il est
possible qu'on batisse les bains comme cela
au quartier que vous le conseillez. Vous re-
chargez pour prouuer ce que vous dittes,
qu'on choisisse six malades auxquels on or-
donne l'eau de l'Observance, & autant qui
se seruiron de celle des bagnez: & l'on ver-
ra quels seront plustost gueris. I'en suis con-
tent. Et vous assure auant l'espreuue, qu'e-
stant les maladies & la vigueur des malades
esgallés: si toute ceste douzaine de malades
sont esgallement assistez, fors que de la di-
uersité des eaux: ceux qu'on gouuernera à
l'Observance seront plustost gueris. Car ou-
tre la plus grande vigueur de ces eaux, on
pourra les faire baigner, estuuer, prendre l'es-
gout, & boire de l'eau à l'Observance: &
vous ne scauriez aux bagnez sans y employer
autre artifice, que leur en donner à boire.
Respondiez pertinemment à mes raisons, & ie
vous cederay.

Après ce iugement de l'eau des bagnez,
vous entrez en cholere, memoratif d'auoir
esté picqué au vif. Je ne fais tort à personne
qui aye veu vostre espreuue: car nul ainsi que

l'on m'a rapporté, s'y est trouué tout au long. si vous estes si grand Alchimiste, que ne monstrez vous par raison, que la façon laquelle ie descriis pour distiler les eaux des bains, ne vaut rien. Croyez vous sçauoir toutes choses? & cuidez vous que sans souffler, nous ne sçachions que c'est? Les grades des sciences plus rehausses, ont comme les causes vniuerselles: *Continent multa eminenter in se, quæ non insunt actu.* Si en vostre profession i'osois vous ranser d'ignorance, ie le ferois volontiers, en ce que vo^r iugez la fin de la distillatiõ que ie marque en mon discours, estre transmutation, & non extraction. Ignorez vous que la transmutation en l'alchymie se faiet de plusieurs, qui apres auoir souffert autant de separation des parties ethereogenees que le degré de feu qui leur est appliqué en peut faire, sont changez en vn: different de chacun de ces premiers, & rapportant à ce qui estoit en eux tous, capable (apres les malaxations, fermentations, & digestions) de rester l'action du feu finie. L'extraction au contraire, n'est que la separation des parties ethereogenees qui se trouuent enclôses dans vn. mesme mixte: les vnes separees visiblement, les autres inuisiblement consummees.

Les poinctes de vostre colere, en la suite de vostre discours, parlent ainsi. Quant à ce que vous dites que les eaux viennent du nitre, &c. Le deuoir vous obligeroit de respondre à mes raisons cotees en la page vingt & sixiesme,

Qu'il y a du nitre naturel, &c. aux nitreuses.

qui vous preuent que nos eaux tiennent du nitre non du salpêtre. Il n'y a point (dittes vous) de salpêtre ny de nitre en la concavité de la terre : & c'est chose auerée , qu'il est fait par art comme l'alun. Si vous vous arrestiez à la raison, & auiez sauouré les escrits des bōs

Lib. sim. tion. Voicy beaucoup des habilles hommes, plic. cap. qui disent le contraire. Mesues, *Nitrum* (dit il) 17. *aliud minerale, Aliud artificiale*. Vvecher authori Antido sé des Medecins de Collogne. *Nitri apud veteres* tar. spec. *libr. 1. multa erant differentie natium, factitium & a-* sect. 5. *phronitrum, quod veluti nitri flos erat*. Et auant

Lib. 31. Mesues, vous ne trouuerez personne qui face mention du salpêtre, ou nitre artificiel. Fors cap. 10. Pline , qui en parle ainsi. *Nam quercu cremata nunquam multum factitatum est, & iam pridem in totum omisum*. Lequel est encor bien eslongné du nostre artificiel , & plustost sel de chaisne , que salpêtre. Les anciens Grecs se

seruoient en Medecine du naturel, cōme d'un fort desiccatif & deterisif. Les Arabes l'ōt recogneu purgatif, tesmoings Mesues, Auerroes, & lib. 5 col Auicenne. Duquel Pline dit que , *Exigium fie-* lig. cap. *bat apud Medos, canescētibz siccitate conuallibus*.

43. D'ou vous pouuez apprédre, que la terre sur- li. 2. trac. habondammēt imbue de ceste substance ni- 2. ca. 84. treuse, la faisoit paroistre en sa surface, quand loco cit. les eaux de la pluye n'en empeschoient l'ex- lib. 10. siccation, ou congellation. Le Seigneur Van- cap. 1. nocio en sa pirotechnie : le salpêtre se trouue (dit-il) communement aux fosses , & spe-

longues qui sont profondes en terre. Ou l'interprète vſe du nom de ſalpetre, au lieu de nitre. Car outre ce que l'vn eſt naturel. & l'autre artificiel: ils ſont en beaucoup differens. Ainſi que les marques que Dioſcorides, Galien & Auicenne attribuent au nitre le montrent. Et encor ce trait de Plin: *Vritur in teſta operum ne exultet, alias igni non exilit nitrum*. Prenez garde ſi noſtre ſalpetre peut eſtre ſur le feu ſans petiller, comme le nitre. C'eſt pourquoy Ruellius dit, *Sal-nitrum, quo in bombardarum pulueres vtuntur, & conficienda aquam fortem ad diſgregandum, ab auro argentum Nitrum non eſt quod Theophrastus, Dioſcorides, Galenus, & Plinius deſcripſere: vt ei, qui hos diligenter legerit facile claſceſcet* Manardus encor Italien fort renommé. *Salnitrum inquit nunc vocatum, quod ex terra paratur, incognitum antiquis (vt reor) ſait*. Et Vvecher, *Sal-nitri, tamenſi proximè ad nitri naturam accedat, nullus tamè eius in Medicina vſus eſſe poteſt, preſertim in his quæ intro aſſumuntur*. Il eſt vray, que le nitre ne ſe trouue point aux mines, ſeulement aux cauernes & lieux bas. Mais la terre qui a le gouſt du ſel, avec vn peu d'amertume, laquelle nous appellons nitreuſe, eſt imbuë de ceſte ſubſtance: & à trauers icelle paſſant quelque ſource d'eau, emprunte ſa qualité, qui luy donne le nom de nitreuſe. Ainſi i'ay parlé de la noſtre. Par le nitre, elle eſt purgatiue: qualité qui ne ſçauoir partir du ſouffre. Par la mixtion des deux, elle eſt diuretique. Du nitre elle prend ceſte proprie-

lib. 2. ca. 39. de cuire plus viste les legumes. Constantin
 en son Agriculture nous l'enseigne, quand il
 dit. *In seminando vna cum stercore & nitrum am-
 miscebis, sic enim parata ipsa ad cocturam facies.*
 En quoy m'amuse-je de disputer avec vous,
Nihil habes, prater quisquilias, & bone vni. Toutes-
 fois premier que de passer outre, ie vous fe-
 ray voir qu'il y a des eaux nitreuses. Lisez
 Trincavel, Constantin, Sauanarola, & autres
 qui ont escrit des bains, vo^u trouuerez qu'une
 grande partie des sources thermales, partici-
 pent du nitre, & de l'alun. Pline la mesme ou
 fait mention de nos bains. *Aqua alie sulphuris,
 inquit, alie aluminis, alie salis, alie nitris, alie bitu-
 minis, nonnulla etiam acida, salsaque mixtura.* Et
aque vero nitrosa pluribus locis reperiuntur. Mar-
 quez celuy cy accompagné de merueilles,
Lacus est nitrosus, exiliens à medio dulci fonticulo.
 Galien, Aesc. Aeginete & tous les anciens tes-
 moignent le mesme. N'auiez vous pas leu
 dans mon discours, ce que i'auois rapporté
 d'Oribase & d'Antillus, pour la diuersité des
 eaux nitreuses, alumineuses, sulphurees, bitu-
 mineuses, & autres. Pourquoi le raisez vous
 sans y respondre.

La mesme raison que l'alun est artificiel.
 vous sert sans autre, pour dire que nos eaux
 n'empruntent rien de l'alun. Escruez vn au-
 tre coup, pour respondre à mes raisons escri-
 tes aux pages 26. & 27. Et cependant appren-
 nez qu'encor que l'alun de roche soit fait a-
 uec l'artifice que Mattheole, & Vannocio dis-

côurent plus lestement que vous toutes fois la lib. 2. ch
mine de laquelle on le tire cõtient en soy ceste 6.
substance, qui artificieusement espuree de la
terre est faite alun. Si vostre raison pouuoit
prouer que nos eaux ne sont aucunement
alumineuses, ce seroit en concluant qu'il n'y a
point absolument de telles. Conclusion re-
pugnante & à l'experience, & à l'autorité de
tous ceux qui ont iamais escrit des bains.
S'ensuyuroit encor yne plus grande absur-
dité, & vne contradiction contre vous mes-
mes. Vous aduouëz des eaux qui participent
du soufre, du fer, du cuiure, & autres métaux,
demi-métaux, & minéraux. Et vous sçavez
tres-bien que la plus-part d'iceux sôt extraits
par la fonte des pierres & terres des mines.
Suffit doncques, que la substance de l'alun, ou
autre duquel on pourroit estre en cõtroyersé,
soit mixte avec la terre dans les mines: pour
imprimer ses facultez, aux eaux qui passe-
ront à trauers. Ce n'est pas tout: supposez
que l'alun de roche, ne fent que par artifice.
Il y a plusieurs autres especes d'alun: & des-
quels les enciens, qui n'ont cogneu l'alun de
roche, ont creu les eaux alumineuses prendre
leur qualité astringente. Galien en nomme lib. 9. de
de six sortes. *Fisile*, *strongyle*, *stragalite*, *liqui-* simpl.
dum, *placites*, & *plinthites*. Lesquels deux der- medic a
niers sont nommez par Aecce: *Crustaceum* & facul.
laterarium. Toutes lesquelles especes sont mi-
nerales, & différentes de tous nos aluns de
plume, de roche, saccarin, escaillé, alcali, ou

catin, & de lie. Pour la cognoissance desquels ie vous renuoie à Matthéole : lequel avec ce qu'il est aisé à recouurer, il en parle autant exactement que point d'autre. Dauantage, tous les auteurs par l'autorité desquels ie vous ay preuue qu'il y a des eaux nitreuses, font pareille mention des alumineuses. L'italie assez frequente en bains, vous fera foy qu'il y a des eaux thermales, nitreuses, & alumineuses. Car la plus-part de ses sources participent de ces deux.

Voila mes deux fondamentales suppositions, suffisamment estanconnées d'autoritez, & de raisons, que l'un & l'autre discours vous fournissent. Passons plus auant dans le vostre. Pour la mine de betun (dites vous) ie n'ay iamais veu qu'elle aye donné ou peu donner chaleur à l'eau, laquelle n'est eschauffee que par la chaleur du souffre. Il semble à vous ouyr parler, que la decision des plus belles contro- uerses depend de vostre bouche. Est-il merueilles que vous n'ayez pas veu, l'estat des choses le plus auant encloses dans le sein de la terre. Les yeux de vostre ame louches, sont incapables de perser si auant. Excusez moy, si ie parle comme cela: vostre temerité m'y contraint. Il faut preuuer ce que vous dietes par raison. Si vous auies eu ce bon-heur que de sauouer la Dialectique, vous scauriez que, *argumentum ab autoritate negatiuum non valet* : & moins de vostre seule autorité. Reuenons à nous mesmes. Ie vous ay dict, que nos eaux sont

Que le
feu, &
non le
birum
est
chanfer
les eaux

soit eschauffees d'as le sein de la terre par le feu, que quelque terre souffreuse, ou autre matiere grasse & difficilement extinguable alimentent. Ce n'est pas dire que le bitum les eschauffe. Probablement i'aduouë que ceste matiere grasse peut estre bitumineuse : à cause que le bitum nourrit long temps le feu. A condition toutesfois que tel nourricion de feu (comme ie l'ay remarqué en la page douzième) soit plus bas que le canal des eaux : sans imprimer à l'eau aucune qualité de sa substance qui puisse marquer quelque chose notable en effait. Car ie ne crois point que nos eaux soient bitumineuses : aussi elles n'en donnent du tout point d'apparence. Peut estre voulez-vous dire, qu'il n'y a point des sources d'eau chaude bitumineuses. Si vous l'entendez comme cela : c'est trop d'ignorance. Demandez à Messieurs de Mont-pellier, si les bains de Ballaruc n'empruntent vne partie de leurs facultez du bitum. Ie ne veux pas m'arrester icy : c'est chose trop notoire. La difficulté est plus grande : si c'est le souffre qui donne la chaleur actuelle aux eaux thermales : ou vn feu actuel qui les eschauffe. I'ay desia prouué en la page dix & septiesme : que le souffre seul, & sans feu, est incapable de rendre les eaux si chaudes. Pour dire le contraire : vous deuez vous accompagner des raisons, plus vallables que les nostres. I'espere aydant Dieu vous faire entendre plus particulièrement, quelles sont les causes qui eschauffent les eaux des bains,

18. APOLOGIE POUR LES
par vn traicté particulier. Ce pendant prenez
garde à vostre contradiction. Vous voulez que
le seul souffre, eschaufe les eaux : & vous ne
pouuez nier en suite de ce, que toutes les
eaux qui passeront parmy le souffre, ne soient
chaudes. Car les mesmes agens naturels, agis-
sans contre vne pareille matiere, & tant qu'ils
peuvent produisent vn mesme effect. Tou-
tesfois es pages 17 & 18 vous dittes auoir veu
au Liege, à Salsbourg, & en plusieurs autres
parts, des eaux sulphurees qui n'estoient point
chaudes. Je ne repugne pas à vostre tesmoi-
gnage : mais ie collige de là, que ce n'est pas le
souffre qui donne la chaleur actuelle à ces
eaux.

Le vain discours que vous faites, des sour-
ces des eaux minerales froides : s'il est en in-
tention de me conuaincre de quelque fau-
te, est fort impertinent. Auez vous prins gar-
de, qu'en la page dixiesme, ie dis, que des
eaux & fontaines thermales, les vnes sont
froides, les autres naturellement chaudes.
Et que au feuillet seize, ie ne m'accorde pas
à Oribase : qui dit que tous les bains qui nais-
sent de soy-mesme sont chauds & secs. Le res-
te de vostre premier chapitre, iusques au der-
nier chef ne merite pas que ie me prenne gar-
de, de vostre immodestie. Je ne repars, que
pour faire voir la verité des choses, que vous
desirez couvrir par le mensonge. En ce qui
est contre moy, mes actions, & non ma plu-
me y respondront.

Examinons la validité du pouuoir, que vous vous attribuez. Encor qu'avec la grace de Dieu, nous puissions tout: *Nam omnia possum*, dit S. Pol, *in eo qui me confortat*. Toutes-fois ce n'est pas nous qui pouuons guarir. Ce sont les medicamens, qui aydant Dieu guarissent: & nous donnons le conseil, moyennant la science que Dieu nous a desparty, de s'en seruir à propos, & selon la necessité du mal, & portee du remede. Dieu est jaloux en ses actions: ayons des mots plus humbles, & plus modestes.

Lisant la kyrielle des maux, que vous rangez sous la souueraineté de vostre domaine: ie suis extremement perplex. Et débats en moy-mesme: s'il est possible que vous reconnoissiez qu'elles sont les maladies que vous mettez en campagne: à vne partie d'icelles ordonnant plustost la poison que le remede. Car à l'ophtamie, qui est inflammation des yeux: & à l'atrophie qui leur arrive: en eschauffant & dessichant avec ces eaux, vous offencerez dauantage. Par quelle raison confondez vous la colique, avec le miserere mei, nomme, *volvulus*. Ce sont deux maladies bien differentes, & de siége, & des causes. Celle la, arrive aux gros intestins: & ceste cy, aux gresles. Celle la, est occasionnée pour le plus des vents: & ceste cy, par fois de l'inflammation du corps, & substance des intestins: à quoy les bains chauds sulphureux, ne scauroient profiter. Pour la pierre: il est

Erreurs
du Chim-
mist. sur
le deno-
bremet
des ma-
lad. gua-
rissables
par nos
bains.

vray que nos bains peuuent beaucoup : pour garder qu'elle ne s'engendre . & à la chasser avec l'vrine, si elle est petite. Mais de la rompre , quand ell'est grosse : & faire que les malades en pissent au lit , sans le sentir : ce ne sont que fables , & vanteries. La carnosité de la verge, auant qu'estre extirpée par corrosifs, en sera rendue plus rebelle par nos eaux desiccatiues. Au cancer , le remede est trop foible. Aux fiebres tierces exquisitez , tierces continues , & demi tierces que les Arabes appellent *minoris fama* : en eschaufant & dessechant dauantage , vous les offenceriez à descouuert. Escoutez Galien parlant de ce remede aux tierces, *Marina autem aqua , & salsa, nitrosa, atque sulphurea, plus quidem bilis educunt, sed multo minus, quam potabiles prosunt: praestat vero neque ipsas viles dicere , quandoquidem plus qualitate nocent , quam euacuationibus iuuent. Equidem noui quendam , corrupto indicio hisce balneis vti persuasum, deinde extenuato corporis habitu ad tantam venisse perniciem, vt tabe consumptu interierit.* Distinguez en la douleur des reins : car si elle arriue à cause de l'inflammation d'iceux, adioustant des estoupes au feu, sera ce pour l'esteindre : vous voulez encor au second chapitre guerir avec ces eaux les fiebres quartes , & ceux qui ne pourront dormir : lesquels dessechez sont offencez dauantage. Bien est vray , que nous pourrons aux maladies engendrees de la melancholie naturelle avec obstructions, nous seruir de nos

Lib. I. ad
glauc.
cap. 9.

eaux: de mesme que Trincavel se sert, de cel-
 les de Abano, & des autres qu'il nomme *Aqua-*
rianas. Entre lesquelles nous pouons loger
 les nostres, moins chaudes que celles la, &
 plus chaudes que celles cy: toutes trois par-
 ticipans de mesmes mineraux. Si encor se re-
 trouuēt quelques-vns, qui abôdants en flegme
 cras & visqueus, logé au cerueau, & en l'esto-
 mac: qui à cestē occasiō māquent d'appetit. &
 ne puissent dormir faute de vapeur suffisante,
 nos eaux leur esueilleront la faim, & le som-
 meil. Ces eaux profitent contre le vomisse-
 ment: mais si elles n'estoient que sulphurees,
 ainsi que vous le supposez, l'irriteroient d'a-
 uantage, puis que par l'autorité des plus ce-
 lebres, les eaux sulphurees subuertissent l'e-
 stomac. Pour vostre dernier chef d'œuvre es
 chapitres 2. & 17. prometez guerir avec ces
 eaux, les fiebres lentes, & ethiques non con-
 firmées. Mais comment le pourrez vous faire
 en eschaufant, & dessechant encor de nou-
 uveau les parties solides. Auez vous prins gar-
 de à ce que j'ay rapporté de Galien, qui dit,
 qu'avec ce remede les autres febricitans de-
 uiennent tabides. Pour confirmation que ces
 eaux nuisent, aux maladies que ie vous ay
 marqué. ie prens en fondement la proposi-
 tion vulgaire d'Hippocrate, *contraria, contra-*
riis curantur. Car si nos eaux suyuant vostre
 supposition sont seulement sulphurees, ou
 selon la verité excellent en cestē qualité, avec
 mixtion du nitre, & de l'alun: ayant la vertu

Li. 1. cōf.
 consil. 9.

h. d. d.
 d. d. d.
 d. d. d.
 d. d. d.

h. d. d.
 d. d. d.
 d. d. d.
 d. d. d.

Preuve
 des sus-
 dites re-
 prehen-
 sions.

h. d. d.
 d. d. d.

Lib. 1. c. 1. d'eschauffer & dessecher, ne pourront qu'estre preindiciables à ceux, qui seront atteints d'intemperie chaude, ou seche, seule, ou avec matiere. Et en qualité de purgatrices, ne peuvent pas soulager accidenterement les derniers: pour auoir en elles ceste qualité fort affoiblie. Lisez ces textes de Galien qui fa-

Lib. de uorissent nos discours. *Si quis magis quidem transpiret, minus autem nutriatur, cum eo quod sicci habitus existit, facile in siccum incidet morbum: ac praesertim, si curis ac vigiliis immodicè occupatus fuerit. Et aeris quoque nobis circumfusi temperatura cum sicca fuerint, exciccant animalium corpora. & natationes praeterea in aqua quae nitri, aut sulphuris, aut aluminis, aut bituminis, aut ascerius huiusmodi facultatis est particeps: & quaecunque medicamina vim habent exsiccandi, siue intro assumantur, siue foris adhibeantur, hac quoque siccum reddunt corpus.* Mais bien plus

Lib. 1. de clairement en certuy cy. *Atque autem ac muria, marinaque aqua, sulphurea aqua, & bituminosa, & nitrosa, & quae chalcantum, & mysi, & chalchitim, vel aliquod simpliciter ex natura calidis medicamentis gustu referunt, inimica sunt omnes calidis corporum nostrorum affectibus.* Paul Aegine- te veut qu'elles soient seulement cappable, pour la guarison des maladies froides & humides: parquoy elles nuiront aux chaudes, & seches. Voicy ce qu'il en dit. *Itaque aquarum*

Lib. 1. c. 52. *naturalium vis est quae desiccet, & calefaciat amplius: ac humidis, frigidisque affectibus maxime conducit.* Doubteriez vous peut estre, que les eaux

lesquelles ne tiennent que du souffre, subuer-
 tissent l'estomac. Assurez vous en avec l'ex-
 perience, & l'autorité d'Antillius, Oribase, lib. 10
 Paul Aeginete, Aecce, & d'autant qu'ils en ont collect.
 escrit. Peut estre toutes ces autoritez, de Orib. c
 ceux que par plusieurs centaines d'années le
 monde à honore: ne pourront vous esmou- loco cit.
 uoir d'auantage, que le reste de vos Paracel- 13.c.167
 listes. Lesquels crient à l'ignorance, contre Impudē
 Hippocrate, Galien, Auicenne, & les plus ce des
 grands personnages des siècles qui nous ont Paracel-
 deuancé. Vous n'en ditez pas moins que cet listes.
 Allemand Dorneus, sectaire en la foy, & en
 la Medecine. Qui veut que sans faire compte
 de tous ces braues escriuains, qui ont fondé
 au ferme, & embelly d'un million de nouuel-
 les richesses les sciences. Nous tirions de la
 seule bible les documents de la Medecine. Es-
 coutez ce resueur. *Stultum est igitur, inquit, iux-* in epist.
ta scholarum vsum dicere, hac dicit Aristoteles in censor.
Philosophia vel Physica: hac in Medicina Galenus, Archi-
aut Auicenna. Nisi dixerit ipse Christus, mentitum dox Pa-
est. Si doncques estiongne de la vraye doctri- racel. d
ne d'Hippocrate & de Galien, vous ne rece- obis d'A
uez que celle de Paracelse. Je veux par luy muior
mesme vous combattre. Vous aurez aprins
si vous auez leu ses escrits, que nostre corps libr. de
estant composé de sel, mercure, & souffre: cutis ap
les maladies (contre celles que le tartre en pertion.
gendre) leur arriuent, comme le sel, souffre, cap. 7.
ou mercure, sont exaltiez. Et que tous in prefa.
maux se guarissant par leur semblable. S. l.2. paru.
 chirurg.

libr. de *suum sal habere vult, mercurius suum mercurium,*
 cut aper & *sulphur suum sulphur.* Il faudra donc se ser-
 supra. uir de ces eaux que vous dites seulement sul-
 phuriques, aux seules maladies sulphureuses:
 lesquelles en la doctrine de vostre Paracelse,
 sont les inflammations & adustions: comme
 vous le pourres colliger de ce qui est escrit en
 lib. 1 ca. sa petite chirurgie. Ainsi en la doctrine des
 18. vns & des autres vous ratiocinez fort mal. Je
 sçay que Dariot à tres-bien expliqué les in-
 tentions de Paracelse pour le releuer des in-
 conueniens, qui suyuent les ænigmatiques
 suppositions de la doctrine. Mais n'entendât
 les escrits de l'un, ny de l'autre, vous ne des-
 messerez pas la fusée. Si par ventance, vous
 voulez donner vne perissable reputation à
 vous, & à nos bains: dittes que leurs eaux gué-
 rissent tous maux, de quelle sorte, & condi-
 tion qu'ils soient. Paracelse vous en fournira
 la raison. Car ces eaux selon que vous en iu-
 gez, estant purement sulphureuses, emprun-
 tēt ceste qualité de l'admixtion de ce suc, que
 lib. 2. Paracelse nomme, *primum ens sulphuris, quod in*
 Archido- *corpus hominis tantas, ait, vires habet, ac possidet,*
 xorum. *vt humida radicalia omnia renouet quibus suis eius*
locis atque partibus. Mais vous n'estes de ces
 braues, qui meriter d'estre nommez Para-
 celsites. Ce n'est pas tout que de sçauoir ex-
 traire quelques essences, car il est assez vul-
 gaire. Il faut outre cela, sçauoir les mettre bié
 en œuvre, recognoissant la qualité des corps,
 la diuersité des maladies, l'actiuité, & gradua-
 tion

tion des remedes. Iay belle peur que vous ne
 foyez de ces disciples de Paracelse, desquels ^{in præ-}
 il dit: *Quandoquidem in meam artem & medici-* ^{fatione}
nan plurimi subintrant, qui sibimet ex ea perperam ^{paru. chi}
aliquod fundamentum faciunt, quo postmodum in ^{rurgix.}
archinagabundos circulatores euadunt.

La piperie de laquelle ie vous tançois en ^{Desslein}
 mô premier discours, vous a (selon vos plain- ^{pipeur}
 tes) extrêmement offensé. Mais ditres nous, ^{du chi-}
 s'il vo^s plaît, ce que vous escriuez, sur la fin du ^{miste.}
 premier chapitre, ne sont-ce pas des arres de
 vostre volonté, qui sous le pretexte de nos
 bains, recherche de piper le monde. De tou-
 res ces maladies nous promettons (ditres-
 vous, moyenant l'ayde du Tout-puissant)
 aux vnes soulagement, aux autres la guéri-
 son, avec medicament de rel goust que desi-
 rera le malade, sans aucune senteur, ny va-
 peur, ny extorsion de ventre. Ce n'est donc
 pas avec les eâux de nos bains, que vous vou-
 lez guarir ces maux, lesquels vous dittes pou-
 voir estre soulagez par nos eaux. Ce dernier
 trait, d'extorsion de ventre (accident fort or-
 dinaire aux purgations) fait voir sous vo-
 stre protestation: que vos esperances sont
 fondees, sur l'antimoine, & non sur les bains.
 Car c'est luy seul qui bien préparé, corrigé, &
 artistement dosé, est capable d'estre admini-
 stré selon vos promesses. O fontaine sacree!
 ô bains que l'antiquité rend venerables! per-
 mettra-on que vous servies de manteau aux
 dangereuses experiences de ces Paracelsistes,

que Theophraste mesme, s'il viuoit, desauoueroit pour siens.

Le reste de vostre traitté, despuis le troisieme chapitre, iusques à la fin, discourt de la façon avec laquelle il se faut seruir de nos eaux. Je renuoye, pour ce chef, les curieux de leur santé, à mon premier liure. Ou, ils pourront apprendre: comme selon la diuersité de leurs maux, & particuliere complexion, ils en doiuent tirer de la commodité. I'y descouure plusieurs façons, de nous seruir de ce diuin remede, & descris tous les moyens, avec lesquels nous le pouuons rendre salutaire instrument, de la santé de nos citoyens. Là i'ay fait voir le desir que i'ay, d'agrandir la reputation amortie de nos bains, contre ces vains parleurs, qui avec vous calomnieusement me ranissent du contraire. Je ne leur ay toutesfois attribué aucune faculté, ny pouuoit, que la raison, & l'experience ne s'y accordent. Nonobstant que les experiences, despuis plusieurs années en soient rares, par la negligence de nos ayeulx qui les a conduits iusques au bord du tombeau. Mais elles y seroient tres-frequentes, pour y verifier leurs merueilles: si l'on reparoit cōme il faut ces vieilles mazures qui restent. Mō premier discours regle fort particulièrement, ceux qui s'y baigneront, & plus succinctement les autres. Il semble que vous ne faiêtes cas que d'enseigner comment il faut boire ces eaux, & se conduire apres: avec quelque contradiction, à ce que i'en ay dict.

Examinons-en d'oc les principaux points de-
gradans le reste du merite de la censure.

L'heure la plus cōmode que vous assignez, ^{de l'heu} à boire les eaux, c'est enuiron les deux, ou ^{re com-} trois heures apres minuiet. A quoy pensiez ^{mode à} vous, escriuant cela? vous n'auiez pas aduise ^{boire} aux incommoditez. Les phlegmatiques pour ^{les eaux} la plus-part, doiuent mettre en vsage ces bains: & comment voulez vous, que ceste humeur dormarde, soit durant voz quinze iours sus pieds à deux heures? Les catharreux qui sont extrememēt offencez par la froideur de l'air, lors mesme qu'ils s'y exposent chauds & la peau ouuerte, pourrontils se desdire d'auoir esté mal conseillez, d'aller deux heures auant l'aube, heure la plus froide de la nuit, au partir du lit, boire à la fontaine, & faire leur pourmenade. Et puis dans Aix, ou à tell'heure vn turban à aureillettes ne scauroit garantir la reste, que le froid ne la perce. Qui plus est, les sains faisant estat de roder par ceste ville à ces heures, ne pourroient le faire qu'à leur dommage: & comment guerirez vous les malades ainsi, qui sont plus douillet, plus sensibles, & plus aisement offencez. Vous estes seul en vos ordonnances: & contraire à vous mesme. Au chapitre onzième, vous leur commandez qu'ils eurent le serain: Pourquoi cela? s'ils ne sont point offencez, d'vne pareille constitution de l'air, qui regne aux deux, ou trois heures apres minuiet. Ceux qui ont avec quelque reputation descript des bains,

Lib. 2. c.
6. rubr 3.
li. 2. c. 9.

l'ordonnent mieux. Sauanarola, homme qui en à fort curieusement parlé, Cloueus, & cét autres: veulent qu'on boiue les eaux thermales à l'aube du iour, ou au soleil leué. En l'eslection desquelles deux, j'aymeroie encor mieux, au soleil leué, que plus matin: à cause que l'air pour lors est assez adoucy, & plus espuré des vapeurs terrestres, desia reheuffees par dessus nous. Il est veritable, qu'au soleil leué la chaleur de ces eaux reçoit quelque remission, par dessus ce qui y paroist deux heures auant que cet astre nous esclaire: mais elles en sont avec cela plus profitables. Non pour estre moins chaudes: mais pour estre despurees de ces vapeurs, & exhalations, qui au tramonter du iour s'abbaissent contre terre, remplissent les lieux soubterrains, & auant couuertes du soleil se releuent au matin. La cause de ceste varieté de chaleur, selon les diuerses heures du iour, n'est que l'entiperistase. Soit que nous la disions estre, vn renfors de la chaleur, contre la presence de son aduersaire: ou vn empeschement de l'euaporation des parties plus chaudes, & plus subtiles de l'eau, occasionné par la froideur de l'air, qui reprime, & condanasse les choses qu'il entoure. Voila ce qui engendre ceste diuersité: ioint à ce, la cause commune du reciproque changement de la chaleur, & du froid aux lieux soubterrains, en huer, & esté. Laquelle ie n'ay encor que peu vulgaire: pour ne rompre le fil de mon discours. Vous en e-

supra.

pour bien operer. Non que ie vueille comme vous, que tous en boiuent esgallement: *Varium enim morbi genus (inquit Cloueus) varia temperamenta, totius & ventriculi varium robur, & multa alia, variam medicamenti quantitatem exigunt & indicant: Eam igitur Medico limitandam relinquantur.* Ce pendant que personne ne desprise nos bains, pour ce peu de mixtion des eaux froides, avec les chaudes. Car cela les rend plus agreables au boire, moins dommageables au foye chaud, plus supportables à toutes complexions, & moins incommodés pour s'en seruir à l'ordinaire. Pleut à Dieu, qu'ils fussent en estat de service: leurs effects monstretoient, combien par ces bains Dieu nous a fauoré.

L'ordre qu'il faut garder à boire de l'eau des bai.

Doncques pour le plus on boira de ces eaux cinq liures, pour vne matinée, & au moins vne liure. L'vn & l'autre à diuers traits, & quelque distance parmy voire mesme avec vn petit quart d'heure de promenade de deux à deux verres. Cela se fait, aux fins qu'elles arrestent moins dans l'estomac & intestins: qu'elles soient plus aysement desparties par le corps: & que leurs vapoureuses exhalations soient plus abondamment portees au cerueau. Mais voicy particulièrement, avec quel ordre on les doit boire? Le corps desia préparé par les remedes vniuersels, avec l'aduis du docte Medecin: on s'en va le matin à la source boire deux verres d'eau, de cinq à six onces l'vn, le premier iour: 4, au 2: 6, au 3: 8, au 4: 10,

au 5: 6: 7: & 8: reculant apres à 8, au 9: 6; au 10:
 4, au 11: & 2, au 12. A la charge, comme j'ay
 dit, qu'apres chacuns deux verres, on s'aille
 promener vn petit quart d'heure, plus, ou
 moins: selon que l'on se recognoistra, plus ou
 moins l'estomac remply, & chargé. La prome-
 nade doit estre ny trop lente, ny violente au-
 si comme vous dites: car l'alleure niaise ne
 vaut gueres mieux que le repos, & le trop ha- Gal. lib.
 ste mouuement, eschauffe plus qu'il ne faut. Au- de tuc.
 3. ou quatrieme iour, la quantité estant as- fant. c. 8.
 sez grande pour faire quelque effect: ou le ven- US. 10.
 tre se laschera, ou les vrines en seront de be- 21. 208
 auoup plus abondantes. Que s'il arriue qu'au- 49
 cunes de ces vacuations ny autre s'en ensuy-
 ue: au cōtraire on sente quelque tumefaction,
 ou pesanteur au ventre, ou à l'estomac. Il faut
 par vomitifs, ou clisteres en irriter la vuidan-
 ge: selon la partie des deux, qui en sera la plus
 chargée. Que si encor ce remede ne baste: la
 racine du *Mechoacam*, ou la decoction des ro-
 ses deuëment corrigees, repareront le defaut
 de ce croupissement. Hors de ceste nuisance,
 le benefice des vaccuations ordinaires con-
 tinuant, qu'on ne se trouble point: par ce que
 la nature s'en descharge par insensible trans-
 piration. Mais la quantité en est trop grande,
 pour en esperer ce bien fait, despuis le qua-
 triesme iour, iusques au dixiesme. Nos eaux
 pour estre moins subriles, & penetrantes que
 plusieurs autres, à cause de la mixtion ia dite:
 sont fort ordinaires d'apporter ceste incom-

modité, quand on en boit tant. C'est pourquoy il faut les ordonner à peu de gens, en telle quantité, & vaudra beaucoup mieux en boire deux & trois verres, vingt, ou vingt cinq iours avec la promenade, & vn sobre desicatif regime de vie, pour en recepuoir de la commodité sans crainte.

qu'il est
profita-
ble de
boire de
ces eaux
aus re-
pas.

Vous interdisez l'usage de ces eaux, aux repas, pour le boire ordinaire, & la cuitte des viandes sous pretexte, que rauissant les alimens de l'estomac auant leur cuitte, remplissent les veines de cruditez. Les experiences, au temps, & aux maladies specifiees en mon premier discours, repugnent à vos soupçons. & la raison ne nous est point contraire. Elles sont de beaucoup differetes, de celles qui s'ot presque aussi tost hors du corps, que dans l'estomac, sans y faire sejour. Elles s'y arrestent assez: mesmement meslees avec la viande à la quantité du boire ordinaire: & aydent beaucoup à la digestion, incisant & dessechant le flegme, & eschaufant & corroborant l'estomac.

Le reglement de vie que vous ordonnez au chapitre huietiesme, merite d'estre sindi-qué. On n'a que faire que ceux qui boient les eaux des bains, pour estre dessechez, mangent trop librement du porage, & moins encor des herbes que vous nommez, lesquelles fors vne, humectent & rafraichissent. Si vostre dessein estoit de corriger l'excez de chaleur, que ces eaux peuuent engendrer au foye,

chaud de quelques-vns: il faut à tels per-
mettre fort sobrement, d'en boire: & si on est
contraint de les leur conseiller, on doit
d'autre façon garantir ce magasin du sang.
Quand vous parlez des œufs: dittes fraits &
molets, pour les dire bons. Vous deffendez
entièrement le poisson, & affirmez qu'il ne
vaut rien du tout. Je ne sçay sous quel sauf-
conduict, vous hazardez si cruëment ces des-
fences à toutes sortes de gens: & mesmes des
especes que j'ay nommé dans mon discours.
Les poissons qui estoient les delices des en-
ciens, & se vendoiēt à la clochette: ne sont
pas si mauuais, qu'il en faille entièrement
deffendre l'usage. *Pisces pelagii* (dict Galien
sunt propinqui pani bene preparato, & pernici.
Pelagii autem vocantur, inquit ille, qui in mare
profundum secedunt. Et ailleurs escoutez ce qu'il
dict. *Porro alimentum quod ex saxatilibus sumi-*
tur non modo ad coquendum est facile, sed homi-
num etiam corporibus est saluberrimum, ut quod
sanguinem medium consistentia generet. Ne re-
partez pas que c'est des viandes des sains que
Galien parle en ces endroits. C'est general-
lement des facultez des alimens qu'il dispu-
te. Mais que respondrez vous quand *Lan-*
guentibus & ægris quibus aqua mulsa & ptisana
fastidio est, pisces saxatiles dari permittit. Clo-
ueus, ou à Clicolo parlant des viandes de
ceux qui sont aux bains dict. *Deinde & pisces*
saxatiles admittuntur in puris & liquidis aquis
per saxa fluentibus capti, qui mollem ac friabi-

Athen.
toto lib.

7.
Plur. 4.
sympo.

probl. 4.
de ali-
men. fac
c. 26.

ibid. ca.
28.

racutor.
cōment.
tex. 27.
lib. 2. de
bal. aqu.

f. 11.

34 APOLOGIE POUR LES
lem carnem habent. Parquoy accordez vous
 avec nous : & permettez , que ceux qui n'ont
 pas l'œconomie de leur corps tant detraquee,
 qu'il faille les nourrir avec la chair sans di-
 stinction des iours prohibez, mangēt du pois-
 son qui ayt la chair blāche, moyennement es-
 pineuse, friable, & non visqueuse. Lequel on
 pourra rostir sur le gril : ou bouillir à l'eau,
 avec du sel, scenoil, ou anis: ou au vin, avec
 du sel, & de la sauge, selon le goust des per-
 sonnes, & qualité du poisson.

Les vieil- Finissons nos censures par la dispence que
 lards & vous donnez à tous aages, de boire de nos
 enfāns ne eaux. Je ne seray pas si scrupuleux, que ie ne
 doivent point permette aux vieillars, d'en boire à leurs re-
 boire de pas. Mais que ces bonnes gens enclos à de-
 ces caus. my dans la tombe, en boient comme vous
 les dispencez : il est trop dangereux. Ignorez
 vous que ces eaux avec ce qu'elles eschau-
 fent, dessèchent aussi notablement : & qu'el-
 les offenceront les vieillards, ausquels les
 medicamens dessiccatifs, selon Galien, sont
 fort contraires. Les enfans aussi en sont ex-
 clus: car les raisons cōtees en ma page tran-
 te vniesme. Que s'il en arriuoit quelqu'un
 extremement humide, & suffisamment robu-
 ste: pourroit avec beaucoup de discretion, &
 de cautelle, y estre dispencé. Vous cōtez vn'-
 experience : qui n'est pas de l'eau des bains,
 continuee vne quinzaine de iours. Et puis
 qui sçait, si tel enfant au ver des merueilles,
 cheut par vostre flegme de souffre en quel-

que fiebure lente : comme il est arriué par l'usage de pareils medicamens, à des plus aagez, & probablement moins delicats.

Je suis lassé d'esplucher plus particulièrement vos periodes, qui sont sans ordre, & mal accompagnez de raisons. Vous debuiez escrire plus curieusement : vn autre fois pensez y mieux. Je regrette que contre mon humeur : vous m'ayez esmeu à vous dire la verité, en des parts que ie pouuois la taire. Sçachez que ie ne contraste point, pour vous apporter de l'empeschement d'auoir les bains : c'est pour exhorter avec la raison ceux à qui il appartient, de faire le choix de ces fontaines avec meure deliberation. Je vous supplie contenez vous, dans les bornes du deuoir : & escriuant ne m'iniuriez point, soit à couuert, ou à descouuert. Mon humeur ne se porta iamais, à blasmer ceux qui font bien, ou autant qu'ils peuuent. Mais ie ne me tairay point contre ceux, qui desseignent des choses preiudiciables au public : ou au particulier de ceux, qui me feront l'honneur de prendre mon aduis. Ce zele, m'a esmeu descrire : & vn autre coup, m'enhardira de mieux faire.

A DIEU.

D. O. M.

L A U S.

Conclu-
sion.